

猗氏縣志卷之七

同知平陽府事濟寧潘 鉞重輯

知猗氏縣事文登宋之樹重輯

藝文

從來地以人傳人以文久故極忠孝節烈之奇公侯卿相之貴智廉勇藝之才而無文以紀之則歲月遷流終與草木同朽耳惡能使千百世下爲之歌詠贊嘆于不窮哉然言之無文行之不遠易曰修辭立其誠則誠又修辭之本也猗邑自樊樂二先生後代出偉人今錄其生平所纂述凡有關於地方風俗者悉存之而其精神

所貫注即誠也布帛菽粟可常可久何用纂組以爲工哉至士女之嘉言懿行壤地之短壑疎林一經品題並垂不朽文之不可已也如是夫

藝文上

宸製

唐德宗賜宸宸台衡二銘序

朕每覽上古之書及唐虞之際君臣相得聖賢同時日夕孜孜講論治道或陳其鑒誠或諷以歌詠煥乎典謨百代是式有以見啟沃之道理化之端意甚慕之而未能追也頃靈鹽節度使杜希全著書上獻多所規諫聊爲君臣箴

用答其意河東等道副元帥司徒燧固請勒石貽厥後人
朕以文旣非工義又非備垂諸後裔良所慙焉起予者商
因之有作庶乎朝夕自儆且俾後代知我文武殿邦之臣
歟

宸宸銘曰天生蒸人性質元淳嗜欲交馳利害糾紛無主
乃亂樹之以君九域茫茫萬情云云目不備覩耳難備聞
觀之聞之矧又非真事失其源道遠莫親理得其要化行
如神失源維何不自正身正身之方先誠其意罔縱爾欲
罔載爾僞體道崇德本仁率義必信若寒暑無私象天地
感而遂通百慮一致任人之術各當其器捨短從長理無

求備事多總集衆才咸遂知而必任任而勿貳以天下之
目爲鑒我鑒斯明以天下之心爲謀我謀則智求賢惟廣
辨理惟精逆耳拂心必嘉乃誠順旨苟容亦察其情斥去
奸諛全度忠貞先人立言爲代作程諤諤者昌唯唯者傾
繫以興亡曷云其輕承天子人夫豈不貴伊昔哲王夙夜
祇畏馭朽爲戒納隍爲志神將害盈天匪假易四海爲家
夫豈不富伊昔哲王勤儉固陋土階罔飾露臺罷構遠竒
技淫巧放珍禽異獸敬之慎之天其求佑欲令必行順人
之情欲誠必著清已之慮心無億詐事必忠恕凡將有爲
靡不三思喜怒以節動靜以時毫厘或差禍福亦隨慢易

厥初悔其曷追刑不可長武不可恃作威逞勢厲階斯起
毒旒蔽明黠纊塞耳含宏光大是亦爲美覆之如天愛之
如子仁心感人率土自理嗟予寡昧嗣守丕圖寇戎薦興
德化未孚大業兢兢其敢以渝俯察物情仰稽典謨作戒
斯言寘於座右

台衡銘曰天列台星垂象於人聖人則天亦建輔臣以翼
以弼爲衡爲鈞如耳目應心如股肱運身是則同體孰云
非親陰陽相推四序成歲君臣相得萬邦作乂感同風雲
合若符契以道匡救盡規獻替木必從繩金其作礪帝者
之盛時維陶唐乃聞疇咨側陋明揚洎乎有虞二八騰芳

爰迨伊尹相於成湯載生姜牙諒彼武王道無不行謀無
不臧君聖臣賢泰運時康漢高旣興蕭曹亦彰烈烈我祖
應期而昌剗滅群兇砥平四方維衛及英啟闢封疆曰房
與杜振理維綱亦有魏徵忠謇昂昂偉茲衆材爲棟爲梁
蕩蕩巍巍邦家有光是知道之興廢係於時主主之得失
資於台輔經之以文緯之以武出爲方伯入爲申甫絕維
載張闕袞斯補惟德是依惟才是求人不易知德亦難周
傳說版築夷吾射鉤任之不疑千載垂休體於至公何鄙
何讐追維哲王必賴良弼矧予不德昧于理術師旅繁起
政刑多失邁茲艱屯夙夜祗慄翊我戴我實維勲賢內熙

應續外總十連威武載揚謀猷日宣長城壓境巨艦濟川
同德同心扶危扶顛予嘉爾誠爾相予理惟后失道亦臣
之恥自昔格言慎終如始功藏萬彙道冠圖史無俾伊傳
克專厥美作鑒勒銘永世是紀

對策

樊遜舉秀才對策

問升中紀號遜對曰臣聞巡獄之禮勒在虞書省方之義著於易象往帝前王匪唯一姓封金刊玉億有餘人仲尼之觀梁甫不能盡識夷吾之對齊桓所存未幾然盛德之事必待太平苟非其人更遺靈譴秦皇無道致雨風之災漢武奢淫有秦車之害及文叔受命炎精更輝四海安流天下輯睦劍賜騎士馬駕鼓車乃用張純之文始從伯陽之說至于魏晉雖各有君量德而處莫能擬議蔣濟上言于前徒穢紙墨袁

淮發論于後終未施行世歷三朝年將十祀啟聖之
期茲爲昌會然自水德不競函谷封塗天馬息歌苞
茅絕貢我太祖收寶雞之瑞握鳳皇之書體一德以
匡朝屈三分而事主蕩此妖寇易如沃雪但昌既受
命發乃行誅雖太白出高中國宜戰置之度外望其
遷善伏惟陛下以神武之姿天然之畧馬多冀北將
異山西涼風至白露下北上太行東臨碣石方欲吞
巴蜀而掃嶠函苑長洲而池江漢復恐迎風縱火芝
艾共焚按此六軍未申九伐夫周發牙璋漢馳竹使
義在濟民非聞好戰至如投鼠忌器之說蓋是常談

天德懷遠之言豈識權道今三臺令子六郡良家蓄
銳須時累糧待詔未若龍駕虎服先收隴右之民電
轉雷驚因取荆南之地昔秦舉長平金精食昴楚攻
鉅鹿枉矢霄流况我威靈能無協讚但使彼之百姓
一覩六軍似見周王若逢司隸然後除其苛令與其
約法振旅而還止戈爲武標金南海勒石東山紀天
地之奇功被風聲于千載若令馬兒不死子陽尚在
便欲案明堂之圖草射牛之禮比德論功多慙往列
升中告禪臣用有疑

問求才審官遜對曰臣聞彫獸畫龍徒有風雲之勢金

舟王馬終無水陸之功三駕禮賢將收實用一毛不拔復何足取是以堯作虞賓遂全箕山之操周移商鼎不納孤竹之言但處士盜名雖云久矣朝臣竊位蓋亦實多漢拜丞相便有鐘鼓之妖魏用三公乃至孫權之笑故山林之與朝廷得容非毀肥遯之與賓王翻有優劣至于時非蹈海而曰羞作秦民事異出關而言耻從衛亂雖復星干帝座不易高尚之心月犯少微終存耿介之志自我大嶽之後克廣洪業禹至神宗舜格文祖陛下受天之明命光華日月爰自納麓乃格文祖儀天地以設官象星辰而布職漢家

神鳳慙用紀年魏氏青龍羞將改號上膺列宿咸是
異人下法山川莫非奇士所以晝堂甲觀修德日新
廟鼎歌鍾王勲歲委循名責實選衆舉能朝無銅臭
之公世絕錢神之論昔百里相秦名存雀錄蕭張輔
沛姓在河書今日公卿抑亦天授與之爲治何欲不
遂未必稽首天師方聞牧馬之術滕行山上始得治
身之道但使帝德休明自強不息甲夜觀書支日通
奏周昌桀紂之論欣然開納劉毅桓靈之比終自含
宏高懸王爵惟能是與管庫靡遺漁鹽畢錄無令桓
譚非識官止於郡丞趙壹負才位終於計掾則天下

宅心幽明知感歲精仕漢風伯朝周真人去而復歸
台星坼而還歛詩稱多士易載群龍從此而言可以
無愧

問釋道兩教遜對曰臣聞天道性命聖人所不言蓋以
理絕涉求難爲稱詣伯陽道德之論莊周逍遙之旨
遺言取意猶有可尋至若玉簡金書神經秘錄三尺
九轉之奇絳雲元霜之異淮南成道犬吠雲中子喬
得仙劍飛天上皆是憑虛之說海峽之談求之如繫
風學之如捕影而燕君齊后秦皇漢帝信彼方士冀
遇其真徐福去而不歸欒大往而無獲猶謂升遐倒

影抵掌可期祭鬼求神庶或不死江璧既返還入驪
山之墓龍媒已至終下茂陵之墳方知劉向之信洪
寶沒有餘責王充之非黃帝比爲不相又未葉已來
大存佛教寫經西土畫像南宮昆池地黑以爲燒劫
之灰春秋夜明謂是降神之日法王自在變化無窮
置世界于微塵納須彌于黍米蓋理本虛無示諸方
便而妖妄之輩棄家出家藥王燔軀波斯灑血假未
能然猶當克命寧有改形易貌有異生人恣意放情
還同俗物龍宮餘論鹿野前言此而得容道風前墜
伏惟陛下受天明命屈已濟民山鬼効靈海神率職

湘中石鷺沐時雨而羣飛臺上銅烏愬和風而杓轉
以周都洛邑治在鎬京漢宅咸陽魂歸豐沛汾晉之
地王迹維始眷言巡幸且勞經畧猶復降情文苑斟
酌百家想執王于瑤池念求珠于赤水竊以王母獻
環由感周德上天錫珮寔報禹功二班勒史兩馬製
書未見三世之辭無聞一乘之旨帝樂王禮尚有時
而沿革左道怪民亦何疑于沙汰

問刑罰寬猛遜對曰臣聞惟王建國刑以助禮猶寒暑
之贊陰陽山川之通天地爰自末葉法令稍滋秦篆
無以窮書楚竹不能盡載有司因此開以二門高下

在心寒熱隨意周官三典棄之若吹毛漢律九章違
之如覆手遂使長平獄氣得酒而後消東海孝婦因
災而方雪詔書掛壁有善而莫遵姦吏到門無求而
不可皆由上失其道民不見德而議者守迷不尋其
本鍾繇王朗追怨張倉祖訥梅陶共尤文帝便謂化
屍起偃在復肉刑致治興邦無關周禮伏惟陛下昧
爽坐朝留心政術明罰以糾諸侯申恩以孩百姓黃
旗紫蓋已絕東南白馬素車將降軹道若復峻典深
文臣實未悟何則人肖天地俱稟陰陽安則願存擾
則圖死故王者之治務先禮樂如有未從刑書乃用